



UKK/600-01/05 (93)

SIARAN MEDIA

KEM ILUSTRASI BOTANI: RASA ALAM - MENELUSURI KEINDAHAN BIODIVERSITI PULAU LANGKAWI

26 FEBRUARI 2025 - Balai Seni Negara Langkawi membuka tirai 2025 dengan **Program Kem Ilustrasi Botani: Rasa Alam**, sebuah inisiatif yang menggabungkan seni, sains, dan teknologi dalam konteks alam semula jadi. Program yang berlangsung selama lapan hari bermula pada 19 Februari lalu ini mengetengahkan kekayaan biodiversiti Pulau Langkawi dan memberi tumpuan kepada flora tempatan yang bukan sahaja menjadi sebahagian daripada ekosistem, malah warisan budaya masyarakat setempat.

Seramai 14 orang artis jemputan terlibat dalam menghasilkan karya ilustrasi botani berdasarkan pemerhatian langsung di Hutan Lipur Lubuk Semilang dan Trail Hutan Hujan, Ayer Hangat. Setiap karya yang dihasilkan bukan hanya sekadar menampilkan keindahan tumbuhan secara visual, tetapi turut juga memperincikan bentuk, struktur, dan ciri unik seperti daun, bunga, buah, serta biji benih.

Antara artis yang terlibat ialah Bayu Utomo Radjikin, Dr. Zaimie Sahibil, Dr. Hushinaidi Abdul Hamid, Dr. Zainuddin Abidinazir @ Abd. Rashid, Zaharuddin Sarbini, Jamal Tumiran, Hashim Man, Rohaizad Shaari, M. Aminuddin Osman, Leong Sok Yeng, Yeo Eng Peng, Mohammad Shahrin Dato' Hj. Shaari, Syahrudin Ishak serta Abu Shukran Md Salleh. Selain berkarya, mereka juga berkongsi ilmu dan perspektif, menjadikan program ini bukan sekadar eksplorasi seni malah turut menjadi satu wadah pendidikan yang memperkaya pemahaman tentang hubungan manusia dengan alam.

Karya-karya yang dihasilkan sepanjang program ini dipamerkan di Balai Seni Negara Langkawi bermula 26 Februari hingga 31 Julai 2025. Sebanyak 28 karya dipamerkan, terdiri daripada 24 karya ilustrasi botani atas kertas, 2 arca, dan 2 animasi AR.

Pameran ini bukan sekadar apresiasi terhadap seni ilustrasi botani, tetapi juga sebuah pengalaman yang mengajak pengunjung menghayati *Rasa Alam*—bukan hanya dari sudut

visual, tetapi juga melalui pemahaman yang lebih mendalam tentang flora Langkawi dan peranannya dalam kehidupan seharian. Selain itu, pameran ini menjadi wadah kolaborasi merentas bidang, memperkukuh kesedaran tentang pemuliharaan biodiversiti serta kepentingan flora dalam ekosistem dan warisan budaya.

Program Kem Ilustrasi Botani: Rasa Alam turut diisi dengan pelbagai aktiviti serta program sokongan. Antaranya, “*Pengenalan Lukisan Ilustrasi Botani*” bersama Encik Mohamad Aidil Noordin, Pembantu Penyelidik Program Biodiversiti Flora, Bahagian Biodiversiti Hutan, Forest Research Institute Malaysia (FRIM) di Balai Seni Negara; “*Nature Walk*” bersama Encik Shaaban Arshad, naturalis berpengalaman dari Junglewalla Malaysia Nature Tours di Jungle Trekking Tour, Langkawi; serta “*Food Survival*” bersama Encik Marzuki Muhamad, Pensyarah Kanan, Langkawi Tourism Academy @ Kolej Komuniti Langkawi di Hutan Lipur Taman Rekreasi Lubuk Semilang. Selain itu, program ini diteruskan dengan sesi pembentangan “*Ilustrasi Botani sebagai Medium Menyatu dengan Alam*” oleh Puan Syarifah Nadhirah Syed Abdul Rahman, seorang artis visual dan penulis buku *Recalling Forgotten Tastes*.

Orang ramai dijemput hadir ke Balai Seni Negara Langkawi untuk merasai sendiri keindahan karya ilustrasi botani yang menyatukan elemen seni, sains, dan alam ini. Untuk maklumat lanjut, ikuti media sosial rasmi Balai Seni Negara dan Balai Seni Negara Langkawi atau layari laman sesawang www.artgallery.gov.my.

Dikeluarkan:

Unit Komunikasi Korporat

BALAI SENI NEGARA, MALAYSIA

No. 2 Jalan Temerloh, Off Jalan Tun Razak, 53200 Kuala Lumpur

Tel.: 03-40267000 Fax: 03-40244998

E: ukk@artgallery.gov.my W: www.artgallery.gov.my

Untuk pertanyaan, sila hubungi:

Balai Seni Negara:

Zuriyadi Sarpin

T: +60 11 1005 5207

E: zuriyadi@artgallery.gov.my

Intan Syazwina Suhaimi

T: +60 19 998 5884

E: syazwina@artgallery.gov.my

Balai Seni Negara Langkawi:

Noordila Omar

T: +6019 5990 884

E: noordila@artgallery.gov.my

Rozeree Mohamed

T: +6010 2552 131

E: rozeree@artgallery.gov.my